

四庫全書

集部

欽定四庫全書

集部

相山集卷一
三

詳校官左中允_臣 璿五珠

主事_臣 呂雲棟覆勘

謄錄副貢生_臣 杭光晉

欽定四庫全書

集部四

提要

相山集三十卷

別集類三 宋

臣等謹案相山集三十卷宋王之道撰之道
字彥猷廬州人宣和六年與兄之義弟之深
同登進士第調歷陽丞南渡後累官湖南轉
運判官以朝奉大夫致仕後以其子蘭官樞
密使追贈太師宋史為蘭立傳而不及之道

故其事蹟不詳惟尤袤所撰神道碑尚在永樂大典中可以考見大畧之道嘗自號相山居士其集即以為名宋史藝文志作二十五卷書錄解題作二十六卷寶祐濡須志及濡須續志俱作四十卷尤袤碑文作三十卷彼此乖互不合今原集既亡無可復証然袤碑乃據其子家狀所書似當得其實也初金兵南伐廬州盜起之道率鄉人據險共保城賴

以全幹畧頗有足稱又其登第對策時即極
言燕雲用兵之非以切直抑置下列及紹興
和議初成之道方通判滁州移吏部侍郎魏
玘司諫曾統書力陳辱國非便尋又上疏論
之並以前書繳進大忤秦檜意謫監南雄鹽
稅坐是淪廢者二十年今原疏雖佚不存而
所與玘統二書具在集中其所論九不可和
之說慷慨激烈足與胡銓封事相匹氣節尤

不可及其他論事諸劄子亦多明白曉暢可
以見諸施行韻語雖非所長而抒寫性情具
有真朴之致蓋有體有用之言固不徒以文
章工拙論矣謹就永樂大典各韻中蒐輯編
次仍可得三十卷疑明初纂修諸臣重其為
人全部收入故雖偶有脫遺而仍去原數不
遠歟乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

提要

欽定四庫全書

相山集卷一

宋王之道撰

五言古詩

和呂叔恭題和州香林湯

是時趙郡苦淫雨獨生精舍中賈邵周出

示和倅呂叔恭詩頗忘
逆旅之態輒繼其韻

新詩等絺繡文采照座右尤憐繼絕唱崢嶸競高秀詞
源眉山長句法杜陵舊相從今老矣宜獨歌邂逅香林
在何許湓沸發巖竇其流漸清溫脉助草木茂歲旱添

苗槁一溉十倍收追游記疇昔我僕苦痛痠別來隔兵
火荆榛挂猿狖溫溫自然湯蠲痼古非謬我聞泉所發
江海遠相透其溫本硫黃氣味自同臭大哉無礙浴天
地不輕授嚴霜與烈日冬夏特異候人生困凌薄往往
少中壽飄飄漂雪力狴犴忽蒙宥春寒不喜出塊坐撥
殘燠晦陰又連朔夜雨屢通晝誰能慰窮愁邵州有賢
守開篋出大軸令我和其後此意重虛辱勉強忘固陋
呂侯卿相家博學靡不究會當似前人嘉猷日告后君

看華清宮誨淫似招寇當年從千官車馬所犇轡漁陽
一炬火曾不半錢售爭如寄僧房泠泠灑苔甃常遂塵
土濯永免脂粉漱

和富公權送行詩韻

公權提刑年兄與之道有四十年雁塔題名之舊
備員湖北始得見君子聯王事相從二年所以眷
予之意何翅骨肉今之道罷官以歸於分攜燕餞
之餘特出長篇寵光行色令人戀戀不能自己輒

勉彊次韻

叨塵四十年靜計所得祿十分才二三清餓似飢鵠中
昨守義陽一時苦窮促忽聞栢臺長表薦徹聰目不惟
免罪戾英游許追逐接武憲漕間寒庖見梁肉從兄逮
兩載種種荷推轂容我數百輩大矣空洞腹為憐昔同
升相看日不足芳時木芙蓉唱酬動成軸燒香每開奩
惠茗屢傾簾青青閱冬夏高視松柏獨顧我如砒砒詎
敢比良玉而兄不我鄙步驟俾繼躅是行集霰候霜威

日增肅解維在朝夕離緒可堪觸戀戀重摻袪移庖過
吾屋紫囊出巨編還我海陵錄全家被燕衍日盡繼以
燭何人繪紅鮮想見鰻項縮腹腴愧偏勸佐此一杯綠
實筐出越羅幣帛更加束酒闌兒女曹起舞應歌曲殷
勤藥石誨美疾肯滋毒新詩追古作高義激頽俗臨歧
沐寵貺固陋敢虛辱但慚水底蛙勉趁絲與竹正爾無
足道聊用資報復謙謙古君子厚德卑自牧請歌伐木
篇敬謝醜真速

有薦胡仁叔為歷陽令者仁叔以詩送知己暇
日楊德潤錄以示予因次其韻

四海皆兄弟三界是道場果且無彼我安用分封疆胡
公歷陽來氣焰何可當威嚴走邨吏不露太守章錦衣
榮會稽暮雨成高唐觀望改儕輩鷄羣鶴昂昂斯民苦
兵火有意哀勞傷豈無九轉丹為助千金方古來記循
吏不稱苟道將殺弟自取酷防人人所防子潛去少室
淵明戀柴桑出處雖異事一夢歸黃梁昔日骨已朽傷

哉今也亡邛國歌栢舟曹風賦鷄梁秋來河伯喜未覩
若與洋大小自有見一笑還兩忘我生分每越泉石成
膏肓棄遺等麟角空虛漫龜腸常欲埋車輪除姦繼張
綱召此人氣和致彼天時康語之有暇矣未窺夫子墻
理所不可及馬腹徒鞭長詎知王者師異日韓張良願
言三顧廬卧龍起南陽

和張詠老

三公與刺史秩等二千石人生不知足犇馳竟朝夕誰

能話名理尊酒時促席賢愚大相遠叢玕映叢荻多謝
張南巢詩筒肯予覓琅琅若明珠其來自靈壁僧房聊
解鞍當暑得偃息挽回清微風筆有萬鈞力

彥嘉通守當今之俊偉人也余心向慕之常以
未獲識君為恨茲因孔純老遂有邂逅之適其
何幸如此將歸純老置酒餞別僕實預坐酒數
行純老丐詩於彥嘉以記坐上笑談之樂頃刻
掃數百言揮毫落紙雲烟飛動永叔所謂盈前

盡珠璣一一難簡汰者殆謂是邪索鄙句不敢
以固陋辭輒和北莊二詩奉呈

春寒不肯去穀雨猶袂衣溪流灑池塘遠看綠生漪識
君恨不早語離我心悲行行欲何往丞郡金房西

顛風送飛雨日日吼東北簷聲決江河傾瀉不成滴朝
來喜新霽晨光透雲隙垂楊翠幄開遠岫青益立孔君
公事暇侯子歸期逼開樽且精設論文萃清集顧我老
無能分甘口挂壁行矣不可挽思君浩無極

送無為倅張南仲歸吉州

吾友李粹老少也游膠庠六年得一第自謂貴且昌社
席不知戒飛黃中道僵三閔大淵獻歲月亦已長嗟嗟
死非所至今未能忘忠言類良藥苦口不見嘗那知兵
火餘獲見同舍郎來承濡湏郡兩歲依餘光邂逅偶及
此為之淚淋浪高義藉激薄美政稱扶傷康沂富邦國
何獨歌王祥江城四月盡麥熟梅子黃歸歟佐吾君談
笑躋羲皇遥應不可留船頭鼓其鐙

次韻因上人晚菊簡魏定父

荊棘困松栢風雨亂昏曉干戈幾時息年來費天討孤
芳如謝安端恐非小草此意誰人知伊余相自保

不學桃與李芬芳競春時天公豈多情清露為君遲榮
悴休問命冷暖當自知青熒夜窗燈相對哦新詩

離索自可笑衰遲誰見憐亭亭搖落中一枝小窗前正
色有家法細看清且妍浮觴未云晚松醪吾所便

經年混蒿艾蘊藏應待時清香密漬沉微風助紛披宋

玉昧秋意乃作兒女悲君子有所養因君觀解頤

道人如青松孤高不成叢愛此黃金花蕭然有淳風新
詩皎秋月警我野性慵佳意不在酒此身今醉翁

介壽誠有取無問人所宜君看菊花潭事見桃源詩東
坡百世士敢比流俗知相逢勿相失不醉欲何時

黃花如故人別久喜復面澆泥一杯酒安用較深淺清
霜開浮雲黃落信風捲巖巖幽素姿秋來不多見

鑑止亭

揚波欲澄濁孰若波暫停止波濁自澄萬象無逃形世人競馳騫方寸不得寧投閒幸一來先生常獨醒

燈下讀魏彥成諸公詩因次其韻呈曾子修諸

君

距春尚旬月春信已回柳時來芝與菌往往出糞朽流俗不自重困窮變操守貴賤等人耳未易遽薄厚桃李何敢輕所報必瑤玖一笑置勿論昔有君子酒

見山堂

淮西提幹章序臣即其官舍遠亭之西為屋數楹
命名曰見山堂蓋繁昌諸山一舉頭則隱然見於
簷外也

浮雲開西風落木下夕陽誰人步東籬采菊哦秋光悠
然若有思此意何可量南山適當前翠色摩穹蒼我心
不期見我眼偶相望咄哉逐獸夫泰山空在旁

西靈鷲

我聞西靈鷲幽奇冠龍舒山神知我來夜雨自滌除籃

昇犯霏微敢憚石徑紆清風偃林柯征衣盡濡樵人
向我言君行欲何如松杉已在望尚有七里餘崎嶇雨
過水蹊雲上天衢飛樓及湧殿崢嶸映浮屠幽鳥若相
喜好音弄笙竽為言一宿覺何妨更踟躕

憩靈鷲道院

黎明發龍門亭午憩西院冒雨且不辭寧能避泥濘是
行良不惡此處殊可戀從今山中人何獨識吾面

追和老杜種蒿苳詩

并序

春晚雨過行蔬畦見園夫栽蒿苳謂予曰苳有二
種其色青而味苦者曰牛耳其色白而味甘者曰
銀條今方得銀條一束於隣翁將栽以作種予顧
園畦纔十數畝已過韭且老矣惟牛耳青青可愛
而園夫以苦鄙之傷時惡直醜正不見容於君子
因和老杜種蒿苳云

我有數畝園荒穢索鋤理干戈何許久生意困屠燬道
也其興與時哉亦甚矣去年失短呂培植乏驅使今年

得老楊衰病更臨起晚菘已蕪沒早韭就茅靡菁菁何
所有蒿苳獨牛耳縱苦可自珍供盤况瀟洒銀條直且
甘風味胡伯始其視李太尉小人與君子明明如古鑑
不慮纖塵止廓廓若太清強欲浮雲滓老氏有遺訓重
去彼取此方今向太平皐夔正端委臺省登碩德要荒
竄誣毀擊寇宜無人蕃將來黑齒破齊在不日逆以誅
正已停觀勞還役杖杜顓采芑萬邦遇有道貧賤古人
耻文王來呂夷漢祖致園綺異時免溝坑願附織貝筐

種田庵

古人即耒耜自有中田廬看君種田庵名異實則如滌
場歸去來宮功不容紓

廡餘堂

高堂面山水境與動靜兼惟動故能樂惟靜故能廡樂
也知有餘廡也笑無饜

次韻魏定文

半年去城府寤寐溪東扉有時得君書想像挾石狻豈

知紀消子養氣如養鷄應響與疾視一洗三旬非我生
坐窮困哆侈傷南箕羆鼠亦何物焉用千鈞機封侯緡
辟統藥等手不龜所用有異耳此言寓非卮梅蕾良可
人如椒綴南枝芬芳想不晚太皞方執規

次韻沈次韓見贈

我狂衆所易賴有君見容十年卧巖壑百念付一空新
詩似流泉涓涓江漢供人言鷄羣鶴我目霜中松相距
無兩舍會見何溟濛誰能寫離索正藉詩思工

次韻許志仁

我技類族庖用刀常月更君才妙天下遊
又得我驚前年獲相值因憶吳中行一別
忽兩載依然舊交情新詩壁夜光厥價輕
連城相思不可見把玩我願盈筆札擅
南州文章動西京行矣秋風高更聽賓鴻聲

盆池

宛苔得古鑑湛湛清不渾大哉壺中天
勿與俗子言誰能時汲井注茲老瓦盆
欲觀從容儵無羨橫海鯤

秋晚采菊和徐伯遠

少皞司肅殺於渠獨留情一枝黃金花照眼增雙明香
清露溥溥秀色雲英英會當飲潭水使我病骨輕

題德章山郭養源墨竹

胷次富盤錯筆端妙蒼翠霜枝宜人為煙葉有生意與
可骨已朽此法誰復嗣偉哉尋丈姿綽有萬尺勢

追和東坡雨中睡熟至晚

春睡酣帶酒晚食美當肉細觀東坡詩萬事貴精熟一

陰七十日雨意猶未足山雲開復合簷溜斷還續東隣
嬌癡兒索飯恣啼哭驚迴夢中蝶重把君詩讀

會河道中

會河村店西沙水清練練我行獨帶月滉漾掣金線凝
寒逼征衣霜華重如霰至此懷僧彌老淚幾欲泣

會河
州

境也建炎初家弟嘗
尉浮光故有是句

和龔聖任即事

新詩似霜月諦玩清且好欲見勢未能思君令人老啟

蟄在朝夕雷雨發枯槁願言從杖屨高吟備搜討

月臺

低迷委徑柳氛氲被池蓮亭前秋雨餘明月來嬋娟高
臺甃蒼玉清風夜周旋舉杯屬姮娥醉舞還蹁躑

小橋

芳榭遶流水春餘半篙綠登臨賞幽花茲亦我所欲小
橋果何往長堤正相屬朝看龜魚遊晚聽鷗鷺浴

次韻朱元順食萱草羹

衰年因羈旅百念日縈繞著龜亦何知憂來又將老出處稍不慎遠志成小草堂陰有孤芳紛葩照人好誰將忘憂姿擷芼等蘋藻充腸固甚慰入鼎可堪擾糠粃貧者事甚矣兄逐嫂異時餐梁肉記此一羹飽

贈術士羅世忠

春秋有羅國之子豈其後家傳錦囊書相地走淮石為問何所宗此法古所授卜瀝與卜宅周孔語非謬用能游公卿所至術輒售有時過吾廬乘間得頻扣談詩涉

坡谷說卦本爻繇是名陰陽家未可容易詬歸歟春雨
霽飛花撲襟袖遙憐玉筍峯巋然挿天秀

送無為宰趙渙水仲

百里寄一令於民為最親休戚咳唾間詎可非其人趙
侯古循吏當世無等倫竭來宰濡須舊政俱更新雖無赫赫
名吏戢民稱仁善良仰若父姦欺畏如神幸哉百里地兩
載銷顰呻果膺君相知贊書下楓宸不終三年淹徑作
帥幕賓秋風散炎酷夜雨清埃塵寧容卧轍留高檣艤

江濱君看眉間黃華近茲其因

映雪亭

蕭然數株梅皓與雪相映臨池鑒踈影影落大圓鏡不
煩粉塗株寒光助嚴靚

題宿雲軒

朝來怯秋霜生撇窳裏清我老顏已衰一杯聊發潁村
虎恠我醉忽吠三兩聲蜀月不可見宿雲有新行

酬朱元順參議

予與元順分攜十有六年當公出守安陸贊畫荆
南予以疎愚自投閒放聲跡久相絕向者汎江之
役獲邂逅於湖陰語不終晷而篙師催解舟悵恨
無窮今乃得相從於都城之東其何慰如之蒙示
新詩輒用韻書呈因以自警云

舟來自金沙敢避江路繞計程踰五月書勞比三考湖
陰見君處取別殊草草因思會面難相從意彌好新詩
何所似繪繡錯華藻賡酬愧空疎祇益我心攪亭否有

時命恭倨任妻嫂行矣無忘飢俗諺戒一飽

送張仲甫赴江西叅議

仲甫叅議與予昧平生臨安一見傾蓋如舊是行
將赴江西余竊快之輒成古風奉送行色

我生坐踈拙逢人輒傾倒語言無淺深出口被伊惱為
孽匪天作受攻本誰造懲非每嚼舌事已復自蹈可憐
愚不靈蹭蹬到今老識君無幾時底裏見襟抱古人重
傾蓋相從恨不早是行若登仙江山為君好無繇挽畫

鷓此意增戀繆何當寄相思臨風慰衰槁

曾欽道家山圖

曾判官式古出按郵傳來歸自濠示予所賦曾倅
欽道家山圖古風予雖未果識欽道而披其圖然
獲於式古詩中窺見一斑恨不即命駕以償願見
之素因漫成二十韻寄欽道尚冀異日遊桐廬訪
子陵之遺跡而謁欽道於家山親見家山之勝而
賦焉紹興庚午六月壬申

永叔愛清潁明仲樂陽羨投老獲所歸為計亦良便何
如強健時從官山水縣升虛得吉卜恍若地祇薦曾侯
卿相種才業固邦彥而況盛德後世祀乃天眷式古吾
畏友被命按郵傳來歸自濠梁訪我出詩卷為言有華
宗疇昔無半面相逢遂相喜笑語至舞忤其家負家山
山水家可戀松篁連森列岡巒互縈轉臺池及花草高
下爛明絢粲然圖一幅規撫坐中見予嘗賦此詩好事
敢獨擅縱橫一千字把玩不知倦桐廬在何許東望眼

欲眩子陵亦往矣釣瀨清練練家山亘今昔昔隱今始
現彼美曾侯賢何當覩巖電

題李夢發搖碧堂

羣仙俯平湖冰壺浸蒲壁薈淪五千頃客一萬尺蒼
松偃旌蓋翠竹森劒戟纖塵不可到湛湛見沙磧詩人
嗜好異方寸富泉石堂成欲臨賦牋管羅几席偶然對
漣漪微風緩搖碧高吟寓動靜真賞廢晨夕璇題壯簷
楹玉軸走賓客清商入蔥蒨積雨洗炎赫翱翔下幽鷺

從容出圓鯽穿荷過獨舸傍柳倚輕策此興復不淺何
日當有獲君方事閒放佳處勿輕擲明年谷鳴騶金閨
遂通籍

和陳阜卿為湯興立壽次韻

我聞無量壽世作天人師有禱必應感如形影隨之吾
見盛德士吏隱江之湄巖巖棟梁材為楠宜所宜守道
心自適怡然見雙眉何當日千里整頓黃金羈嗟予拙
無用正坐干林姿荷兄獨青眼少雪羣兒欺蘭菊雖異

芳春秋莫予遺相逢一尊酒
駐馬聊共持偶觀香霧鬱
彷彿初生時願兄壽無量
登庸侍彤墀年年遇今日
酌酒共瑤卮

| | | | | | | | |
|--|--|--|--|--|--|--|--|
| | | | | | | | |
|--|--|--|--|--|--|--|--|

欽定四庫全書

相山集卷二

宋 王之道 撰

五言古詩

次韓子雲白蓮韻

金縷不相稱，紉素新裁衣。坐令時世粧，屏跡從招揮。
施粉定太白，增分却成肥。須知冰雪肌，秋月揚明輝。
來從姑射山，一洗百念非。何煩障青綾，高談解郎圍。
亭亭翠蓋中，老眼省見稀。搖風自披拂，照水相因依。
傍觀慎無

前恐犯丞相威不如太華巔食藕家翠微

追和元微之春餘遣興示王覺民

物態有榮悴時令互消長墮身名利場魚鳥在羅網豈
無金屈卮聽此石方響殘花日晴陰落絮風下上春事
雖已闌餘芳尚堪賞我有臨溪亭疎櫺為君敞青青小
荷錢雅與水相養狂吟醉題壁縱步懶扶杖仰止李謫
仙筆端走羣象九原不可作夜夢見精爽栖栖亦固矣
君子坦蕩蕩相期醉醺醺偕來衆無歎

九江解舟順風追和張文潛

朝來轉西風天巧借吾便解維湓江口去若絃上箭水
光漾朝曦過浪掣驚雷周旋謝神貺冠坐敢不變斯須
走四驛俛仰驀二縣誰知久留滯一旦乃適願吾聞信
由中溪毛可羞薦咄哉和氏璞底事待三獻亨否自有
時時亨百無譴雷聲在淵默若訥故大辨千巖與萬壑
左右供几硯落帆風亦止壁月熨江練

花洞

浮渡竟何處欲游未能游夢寐金谷巖神往形獨留異
哉城市中芳菲自春秋長紅雜團綠結成巖穴幽

怡顏堂

人生無百年半被憂患苦其間開口笑一月僅四五誰
能盼庭柯怡然見眉宇積財不得用真是守錢虜

蒸紅亭

桃源果何處溪流出殘紅忽然見桃花灼灼搖春風蒸
成日邊霞高吟思無窮

史佐才讀書堂

我聞輪人扁妙解書中義當其聽讀書默識聖人意忽
然釋椎鑿有問發茲秘雖云聖人語糟粕豈精粹齊侯
詰其說無說當致死請以斲輪觀固入要非易不徐仍
不疾心手在相契是有數存非言所能既扁也亦何
人所得乃至此固知斯道在天下本無二觀君榜斯堂
令我端拜議想見堂中書填箱溢中笥縱橫三萬卷一
覽悉能記左右逢其原下筆不能綴我昔攝東城君時

尚童穉如聞侍先公往矣江之溪崎嶇三十載於此忽
相值出示諸公詩圭璧爛庭瑞君家依水竹亭臺繚幽
邃作堂於其間讀書乃其事嗜好與人殊可以見君志
明年冠羣英先正秘書字

題王亦顏清心閣

湖光浩無際遠與列岫并風澄烟霧開炯若鏡面平高
人對萬變寸田常默耕擾擾亦何為豈容方寸櫻有時
鑒湖光愛其靜而明那知水是物心清物還清徘徊不

忍去傑閣指顧成閣成何所喜畫棟連朱甍大江西南
來羣山東北橫江山不待招宛轉趨簷楹諏度多暇日
登臨有餘情論文一樽酒對客手自傾酒闌復徜徉觀
書美潁泓使人之意消鄙吝何由萌嗟予頑鈍姿栖栖
亦勞生從今事疏淪永守清心盟

追和韋蘇州詩呈周守敦義并序

癸亥五月兀坐逆旅中讀韋蘇州郡齋雨中與諸
文士燕集詩玩味兵衛森畫戟宴寢凝清香之句

不能自己輒用韻書呈敦義知府舍人年兄以丐
繩削

江城五月雨千里荷花香清風吹葛衣鈴齋有餘涼日
晏吏卒散槐陰掃高堂歸來欲偃仰歎息不敢康設醴
致佳客論交到相忘高文如大烹未慣染指嘗何當侍
函丈獲賦蔓草章君方扶搖搏我獨蓬蒿翔生平一
壑美未見北海洋願言承至教雖老當自強

寄題魯如晦需堂

魯僖有賢裔家在吳江東宏詞與奧學浩渺江無窮魁
然棟梁姿久困荊棘中抱能未施邦殆與張籍同人皆
盲於心我目昏不矇而君乃勇退奉祠環堵宮築圃號
通隱花竹羅青紅郡山湧其前湖光湛冲融日哦松菊
間志氣驕王公客來醉需堂飲食需奴童嗟予老且倦
齒豁仍頭童田蕪未能歸慚愧通隱翁

題李夢發知足齋

荀卿重無禍老氏貴不辱不辱非暫榮無禍乃長福咄

哉名利場甚矣身世桎得侯方巧公懷金未忘玉經營
蛾赴火犇走蠅嗜肉方當從後搏寧復念前覆李斯悲
黃犬揚雄誚丹轂二者倘胥失萬此亦何足是理甚易
知允蹈君所獨使人之意銷豈止我心服不貪子罕寶
屬厭女寬腹庶幾聞高風將遂變流俗

夏日雨霽郊行次韻劉春卿

皇天久不雨既雨晴亦好食已得從容偕行石城道桑
麻光似潑山林淨如澡蒼苔長綠髮嫩竹搖翠葆離離

實攢檣藪藪花褪素風梢水中蒲烟葉湖外草新秧良
可喜勃然見興槁老農競耘耔出作恨不早誰家列午
餉蔬筍雜鮮薨田頭立婦子柳下坐翁媪寧能擇豐甘
放筯等一掃旁觀猶快意想見慰傾倒嗟予少力穡自
取官遊惱何當賦歸來鬚髮已華皓

次韻陳勉仲登羣山觀

十年放江湖親朋益疎散不知跬步間游覽有奇觀因
君寄新詩心目益悽斷東城俯荻洲下有魚鳥亂想見

江南山終日對書案小立筇杖倚兀坐葛中岸高情渺
雲外竝議涉唐漢嗟予衰且老兒輩逼婚冠豈復敢言
詩觀詩重增歎春容來大軸玩味起頑懦窮愁欲誰知
富貴當自斷探虎愧呂蒙思鱸抗張翰別來能幾時鬢
髮暗凋換養成杜甫懶甘作元結漫何當遂拂衣疲馬
解疆絆卜隣大期東攜酒日相看

題龍舒天祚宮玉虹亭

山祇不愛寶傾寫白玉雲秋陽正炎赫噴薄爭清明我

疑石韜玉白虹貫巖泓源源自何來萬古風雷聲

聞蟬和彥時兄

浮光我家尉近處惟高安嘗欲為親擇敢作非意干憶
昔從東來飛雪凌羈單青春不可挽明月裁齊紈三釜
竟何地一囊今屢殫我有醉翁吟試從徼外彈古人骨
已朽知音果哉難擎拳抱枝蟬未露先號寒緬想江南
山瓊梳碧成攢僧牕開南薰俯仰天地寬詩成有佳句
往往勝得官

贈筆工柳之庠

我昔丞歷陽好筆得柳生維時習治久羣盜方縱橫生
售數毛穎一一簡擇精作字可人意為我供筆耕不知
二十年天下乃復平爾貧技不售我困功無成布衫負
窮筮羸然過柴荆我老廢讀書無意游管城千錢與斗
米聊爾餉此行歸家飽妻子一笑嘲彭亨

送彥立兄遊太學以恩袍草色動為韻

鼠腊要非玉虎聲偶先墮窮通一生事早晚焉足論行

行欲何之闊步登金門有意韓淮陰報讎如報恩

西風曉飛霜獵獵吹征袍丁寧顧婢語肯效兒女曹舉鞭問長安詩海今誰豪我欲從之遊痛飲歌離騷

文章我家勅人喚腹為藁隨行載中書所至得揮掃新詩如秋月皎皎清更好惠連有佳夢池塘遍春草

梅花破朝寒似欲壯行色駸駸小驪駒回首便數驛一鶚在雲路鷺鳥空累百從今馬賓王不是新豐客

君子贈以言古人重相送大梁在何許我心欲飛動兄

才如青錢萬選仍萬中行矣喜冬晴北方地多凍

題璋老清閔軒

予暇日過吉祥愛其竹徘徊不忍去長老璋公方
葺小室丐名於予因誦退之筍添南堦竹日日成
清閔之語取清閔二字以名之後五年歲在壬申
三月既望璋訪予索詩不辭為賦此詩

典午接曹氏其風扇浮虛當時波浪從高談乃其餘竹
誠松栢流一日不可無子猷為此語千古誰能渝堂堂

韓退之議論荀揚徒詠竹美清閔長篇載諸書吉祥在
無為隱若西南隅我來過梅雨新竹環精廬風梢弄蒼
筴日影穿扶疎高標挺直節勁特凌萬夫道人謂予言
吾方葺吾居公其為吾名要令與實符清閔退之詠是
軒良不孤何當對此君搜吟更躊躇

和魯如晦喜雨

我本山中人當暑玩泉石高吟清風朝長嘯明月夕前
年徙江城舴艋劣容席是時暑雨過黃流沒青荻城中

無置錐餽舍至三易邇來成小築風月得相覓執熱想
飛瀑白練掛蒼壁頓從金甌中令我獲蘓息尤憐昨夜
雨洒濯有餘力

假山

幽人愛九華胃臆富岩竇疊石談笑頃窻間列遠岫一
拳儻興雲其功等高秀君看負山者盍亦備茲冠

柳徑

我笑陶彭澤門栽五株柳柳成復自號清陰亦何有豈

如兩分行一徑入花叢白氈春盡時青障雨晴後

古松

老松如蛟龍氣奪百萬軍根蟠蒼崖石梢拂青天雲山
神護野火地主訶樵斤魁然棟梁材為之獻吾君

白蓮池

白蓮如玉人高潔謝脂澤圓荷作翠蓋掩映秋水碧小
亭日相對無言倚輕策

種橘

或言千樹橘貴可比封君先生種橘意此計何足云珍
絕色香味解醒有餘勲

次韻王山甫春日出郊探梅

倚竹有佳人天寒玉肌溫永懷經年別及此春日暄幽
閒誰與娛依依映丘樊計臺二三友才高工撥繁幕府
公事退聯鑣出郊原城南富卉木勝處陳家園東風發
萌芽柳眼暗若昏昨宵一陣雨清爽到乾坤植杖芳草
徑繫馬枯桑根觀梅不忍去錯俎羅金樽主人笑揖客

徘徊倚朱門指麾羣兒輩薪水相撫存隣婦抹紅粧來
覘攀籬援酒酣詩思逸筆力華旗塞薑鹽毫蕪菁絕勝
瓠葉幡蕭然出塵姿飄飄欲騰掀桃李分當避蜂蝶那
敢喧誰能移將歸栽培擁高垣要令百種花俯伏爭趨
奔不煩頻出游正恐嘲短轅太簇初應律飛靈尚翩翩
何妨醉瑤舟大嚼供炮燔手撚一枝春吟笑窮曛暝可
憐廊廟具沉滯三家村和羹似不晚作詩與招魂

對雪和子厚弟四首

凍雲不成雨巧作白玉霏寒光僭曉色報我東窓明起
來撥殘灰煖酒手自傾多謝麴居士於人殊有情

前村不多地坐覺阻且長梅花應已開鼻觀來清香天
公愛衰朽古木敲鳴璫僵僕巧耐寒冰柱生承漿

青腰夜種玉不見稠與稀將軍欲何往溱洧正流澌軟
火燒黃精我爾寧苦飢行行復行行舌在請勿疑

瑶林我家風銀色佛世界泠泠一川水淙玉漱寒瀨敲
冰往得魚撥凍自挑菜山居果如此冷暖任交態

和沈元吉與唐用崔乞菊

黃花如幽人別來心念之邂逅適我願詎可無一辭緬
懷東籬游舊與西風期乞我三百株爛醉風前杯休文
有佳裔咳唾成新詩把玩乞菊章頗愧前篇非寄言崔
藍田捨之復誰貽

和魏桐城題三瀑泉贈湯洞卿

竦竦響空山飛連掛絕壁毛髮忽森豎精神共英特平
生丘壑姿至此意頗適何必遊九華龍眠自尤物

雨電碎晴峰珠璣瀉石壁勢增九軍勇氣壓百夫特先
生我輩人一見願自適壯哉三瀑泉表表塵外物

題雙峰磨院瀑布

烈日冰雪皎淡烟玉虹明誰云真珠簾要之亦強名我
來少躊躇一洗塵埃清便欲覓千斛為壓歸裝輕

予紹興三十二年夏四月三日行部至山中時
月上人方入山十有八日旋披荆棘立數椽以
居其徒明年改元隆興夏六月二日再過山而

堂室粗備且於雲母泉側創為茅亭使往來觀
者得以駐足而酌甘誠可嘉也時巴陵尉臨川
李克仁高密劉孝傑華容尉權三衢徐二譽在
焉子邁待行

去年入山時孟夏暑猶薄來觀雲母泉陰崖坐盤礴老
禪披荆榛經營始興作山空斤斧響丁丁振林壑俛仰
恰周星炎赫若凌薄昨朝發岳陽東風怒還惡驚濤送
輕舟十里沙頭落投涼不待曉肩輿上磽确僧徒笑相

迎此意安可却高亭陰白茅羣峰峙青廓偕行二三子
臨泉一杯酌呼僮淪石鼎煮湯旋和藥誰令俗士駕急
去能不忤因成數句語聊發後來噓

欽定四庫全書

相山集卷三

宋 王之道 撰

五言古詩

癸酉閏十二月朔旦入夜雪復作靜言歲歎斯
人艱食展轉不能寐強沃一杯徑醉因成此詩
宿雁驚江渚餓彪嘯林丘不知雪如許但怪風颭颭起
看堂前柳枯梢憂鳴球安得萬家春解我飢寒憂旋支
折脚鐺移燈視床頭發蒙餘半餅聊溫三四甌鳴腸時

一沃曲身漸和柔
遥應原野間
錦衾覆釐薺
農夫待錢
鑄指日望有秋
願言開同雲
東郊從春游

再用前韻謝潘壽卿見和二首

小人南郭綦
君子東家丘
相從濡湏塢
雪案風颭眼
界眩晃綿耳
根悶鳴球
何妨具杯酌
一笑寬百憂
不見劉帶花
逢愁但搖頭
時來看崔盧
姓名覆金甌
我願霽晨霜
栗烈還溫柔
黃金著高柳
綠浪翻來薺
要令扶犁
兕力田
遂逢秋飽食
奚所須
鼓腹同天游

新詩清絕俗想見胷中丘飛泉落高峰風聲助颼颼又
如清廟中河圖見天球不惟竦觀瞻玩之可忘憂是行
何處來楚尾連吳頭一杯聊效芹大似勝茶甌賡我喜
雪章詞情和且柔久旱民苦飢重憐來與薶勃焉來爭
春富哉薶向秋吾君德無邊今與和氣游

再用前韻謝張濟之見和

我欲訪蓬萊長笑挹浮丘此身挿兩翼冷然御颼颼樓
臺聳瓊瑤草木叢珠球周旋於其間不知塵世憂願言

久未遂俛仰今白頭茅齋夜飛雪碎玉敲風甌平生鐵
石腸化作繞指柔年飢百無贏接新待來薳君才似鵬
鷗脩翎正橫秋沖天在不日入侍巖廊游

四面山午飯澡雪塵土往太湖二首

白沙浥夜雨蒼松弄朝日清風滿行路駸駸馬蹄疾溪
聲靜如漱嵐翠濃欲滴我豈山中僧前身飽游歷
重門掩松篁傑閣憂霄漢溪流水晶軟石棧雲母粲清
游不可失微勞敢言憚斜陽無相催我欲濯塵汗

次韻徐伯源九日閒居追和淵明

閒居遇重九對酒懷陶生陶生不可見愛此重九名清
霜肅時令天宇增高明依依遠山色隱隱賓鴻聲泛酒
黃金花人言可延齡嗟予不解飲酒到從之傾媯然木
芙蓉搖風倚東榮雖無窈窕歌自足娛吾情鼓琴復何
為年來泯虧成

追和東坡喜雪用王覲韻

長安一夜雪酒價湧朝市何人獨耐寒脩然立庭砌盈

盈竹間梅靚粧欲誰媚冰肌與玉骨似不勝風袂豐年
貴三白麟鳳敢稱瑞要令輿論協庶遂我心慰春面在
朝夕枯荻動和氣尤憐麥蓋錦秀發功必倍憂葵亦何
為度日同度歲不如擁百城陶然六經醉

對雪二首再用前韻

同雲晝暗空孤城早休市行人失道路賀客擁堦砌翻
縞語亦工飛絮思爭媚飄飄何所似想見六銖袂盈尺
信為大三白乃成瑞梅花不畏寒點綴若相慰高吟撫

凍鬚詩社頗增氣薰然一杯酒神速功力倍來甦被餘
潤預可占有歲便當呼老農潑醅取沉醉

我笑袁司徒閉戶雪中市高眠罷炊爨水榻對瑤砌豈
如王孝伯鶴氅鬘清媚隨風楊柳花縱橫撲襟袂冬溫
犯春令破白已為瑞何妨盈地尺萬井共歡慰草木含
餘滋山川鬱佳氣清寒入詩骨敢問酒價倍日月同過
鳥燐烈又興歲老大不足悲吾今但心醉

書懷示周少隱石司

我生動多艱一笑不易得
竭來坐逆旅俯仰空太息
吾人當代秀文章擅華國
分攜十四載復此見顏色
忽忽未及歎歸程忽云
逼願君因索塗為我指南
北金門與玉堂努力事
登陟閒將咫尺書因風
寄相憶

因納上人寄題望江張氏春暉亭詩

青青原上草初生殆毫芒
邇來沒蓬蒿似有三尺強
春暉主發生萬物資餘光
遲遲雖不暴萋萋自能長
條風與穀雨其功固難量
予嘗優劣之豈得相輩行
大哉發生

恩欲報不可償東野古純孝作詩本肝腸懷親感春暉
義見遊子章凱風亦遠矣此道何茫茫惟餘東野詩千
古遙相望張公雷江人鷄羣鶴昂昂冰魚與冬笋志慕
孟與王結廬守松楸至行稱淮鄉我不識君面因詩得
其詳

一經堂為王亦顏題

我生非我有天地暫委形諦觀子若孫相值如浮萍崔
昭與李兼甚矣愚不靈積錢遺芸窟轉手還星星何如

散籛金人遺以一經韋賢不可作高風看典型公家世
植德蘭玉滋芳馨三鱣偶墮砌伯魚初過庭明明有聖
訓言之爾其聽退而學詩禮齋扉晝長扃矻矻對月牖
孜孜守風櫺冬映孫子雪夜聚車公螢有時聞誦詩流
泉韻泠泠懸知睟見面巖電仍雙熒行當擢賢科發策
驚天廷致君此其術何獨取紫青

苦雨呈蘄守徐次公

涉春苦淫雨連綿過梅夏西來二十日終朝走泥濘林

霏欲開戶簷溜又淙夜勢如黃河翻聲若滄海瀉頽垣
就崩摧敗屋遂傾卸垂成麥傷潦將老蠶病柘那知困
羈旅正恐害耕稼痛哉兵火餘人物久凋謝瘡痍索撫
養鬼瑣煩教化方推中年恭復獲潁川霸是行良不惡
漸美同噉蔗况承雙魚書敢緩千里駕平生慕山水尋
勝每偷暇何妨見君子大厭顧榮炙一舉欣兩得重趼
輕百舍登臨興何窮吟詠樂無價猿鶴互酬對雲煙競
邀迓巖松升龍矯溪橋斷虹跨尚恨阻豐隆未果訪姑

射須煩段文昌一出補天罅

告春亭詩為江寧令荀晉仲作

淵明晉高士從官非所好當時令彭澤為米聊寄傲公
田三百畝一稔足炊醪明年春二月農以仲春告為言
當舉趾西疇雨如膏雨後春日遲不寒亦不暴欣欣木
爭榮民析肯居隩感此萬物時吾年迫衰眊餘生復幾
許遑遑近顛倒翩然賦歸去豈為折腰躁兄也今淵明
強盛當遠到學問窮古始文章配盤誥十年宰兩邑五

月政三報去冬得兄書憐我加慰勞仁言暖於帛失喜
至舞蹈其間何所云作亭縣之奧為農榜告春此意在
勸導我欲求子詩併以示倪耄春作苟盡力秋成可無
禱先當起疲瘵次用振凋耗別來忽九載觸緒增戀嫪
塞命敢不勉一笑一杯犒

次韻同年蔡仲平察院遊西湖

朝日不受霧晴光似暉暉忽然快我心清風為解圍坐
見九里松旌幢碧相依天竺了在望上有祥雲微西湖

一千頃圓荷覆青衣輕舟競遊覽往往俗客稀幸及新
雨霽欣逢露初晞水光與山色高低映郊畿佳哉氣葱
鬱觀闕何巍巍誰云門庭遠咫尺永天威諸公萃俊傑
高論玉塵揮載酒旨且多不醉無庸歸餘歡到獻酢灑
灑雙鴛飛新詩爛錦段想見勞心機顧我雖百拙續貂
重相違明年若重來種種當如幾

和秦壽之喜雨

雲峰擁稜層不動若頑石追涼困無所何當日云夕揮

簑汗如流欲卧莫安席雲頭從北來微風動疎荻滂沱
一尺雨旱魃驚辟易巾屨獲暫御尊酒容復覓誰憐貧
長卿空洞家四壁熬熬爐炭中萬物同一息明朝槁苗
興農畝歌帝力

秋日訪程元明喜雨而作

去年夏六月我來自臨安滂沱一夜雨原隰俱瀰漫俛
仰忽再秋秋旱畝澮乾嘉穀槁垂盡萬口空長歎我從
相山來朝雲起巔岼油然遍寰宇半道濡征鞍亭午至

君家簷聲落驚湍詰旦視大田青青已堪看會見百室
盈陋巷飽一簞何獨解君憂我心其少寬襲芳富卉木
秋炎苦摧殘柯葉頓欣榮秀色良可餐速宜置尊酒一
洗儒生酸我雖不解飲醒狂佐君歡

和天寧因上人韻送僧用懿住桐城金繩山

老松如蛟龍秋來露鱗甲雷霆昨夜雨奮迅以時發道
人槩可流出世雨相法至今獅子吼狐兔尚驚惶金繩
小金山突兀一峰拔桐城舊知音相招遺書札世情強

輕重祖道無廣狹天寧有佳句鐘磬闕鏗�嗟予丘壑
姿晚歲麋鹿狎屬和良不工前詩萬鈞壓

送延上人歸雲峰

去年出山時飛雪正撩亂慙懃大洪老呵筆寫真贊為
言化菩薩持鉢江北岸欲將說禪相醒彼瞋睡漢別來
能幾日漚滅水且泮似聞妙湛師接踵還舊觀公歸勿
惆悵生死同夜旦幸有囊中金了此一重案

送遵禪者

阿遵我輩人相從十年舊行肥形愈瘠身貧道常富厥
初為天衣持鉢化淮右袖攜維衛錄訪我過蓬陋若言
法華山有象金所就其來自西土隱現不可究我時嘗
記之爾耳亦聊復誰令慈悲師鏤板播踈謬向來天衣
遊追隨遍巖竇高談屢絕倒寢食廢宵晝歸歟又同舟
半道過濠壽是行寄先塋一再獲邂逅清霜殞羣木淒
勁搗衣候翩然不我留雲山挺高秀

次韻慧上人見寄

別來六改歲想遍江南山江南二百州雲水相往還秦
望冠吳越嵯峨俯塵寰法華在其側參差擁高鬟幽花
自芬芳好鳥時綰蠻傳聞發夢寐登覽忘劬艱去年謁
老聰默坐焚金顏忽然獅子吼頓覺醒冥頑子今從之
游舊習湏夷刑人人自有分既悟不我慳請看釣魚翁
滿船載魴鰈

用東坡三峽橋韻贈源上人

解衣振林霏欹枕聽簷溜飢腸欲雷鳴病耳忽牛鬪自

嗟兵火餘十載困淮石崎嶇窮水石邂逅遍巖竇山遊
雜麋鹿野處狎猿狙那知膏粱肥但覺蔬筍瘦寶林吾
北鄰晨夕鐘鼓奏踈篴玉森列樛木弓半彀來為聖人
祝歌嘖發清晝歸餘雨脚稀溪流靜如漱

和韋蘇州遊靈岩山寺韻呈言上人

我老懶成癖貪此林泉幽誰令吳中來兩月乘江闊
門十日雨不得歷虎丘讀子靈岩詩還復令我愁想見
韋左司擁騎當年遊山中雨新霽綠樹鳴鶯稠乘興自

不惡金風颯清秋

游白雲山海會寺

龍舒富山水白雲又其角七峰互回環仰見天一握古
木森建幢蒼藤大張幄初疑翠黛掃頗類青玉琢飛泉
何處來其勢自天落轟撞吼雷霆激射紛雪雹田家承下流
伐石競耕鑿搖風麥初齊泛水秧尚弱恍若桃花源誤
入不容却況有古道場碧瓦照丹雘樓臺鎖煙霞松杉
聚猿鶴我來孟夏初征衫汗如濯行行不知勞梯雲上

青廊入門寂無人幽鳥自相樂登堂趙州出此意亦不
惡徐徐叩其端善巧萬金藥銷除愛欲惱澡浣塵土濁
山神似相留入夜雨還作明朝出山去欲去更盤礴何
當賦歸來寄傲酬素約

題三祖山

觀山不憚遠有癖老增劇是行迫王事所過飛鳥疾路
傍四五祖不得着脚歷朝來所幹集我願客自適衝寒
走海會嘯吟遂終日眷言三祖山經從阻良覲僧果知

我意飯僕濟行色崎嶇五十里入山及未是山頭殘雪
在青瑤點微白殷勤承老禪傾蓋同莫逆為言住此山
予寶始今日欲以扶我衰不鄙昔輕策捫蘿助探討躡
石共登陟羣峰聳遥翠一水漲深碧行行何所喜兩脚
有餘力歸來飽香積清淡更過昔

五祖山

我生事幽討塵埃良獨難竭來舒蘄游登臨每長歎如
何勝絕境佛屋多所安大哉慈悲力神功助剋剋住處

未易言小道亦可觀五祖古名剎樓臺倚巔屹崎嶇六
七里縈紆三百盤懸崖擢青士夾道羅蒼官飛泉響環
玦幽芳馥沉檀我來及新霽千峰碧玉攢忽聞祀犬吠
旋覺壺天寬水聲擢午暑嵐氣生晚寒心目快開豁腰
脚嗟蹢躅看雲更揜筇披風少凭欄欲營五畝宮它年
寄衰殘試煩問祖師莫作非意干

贈浮屠有則

我老不能詩其窮類詩人多謝二三子強以窮相親師

從何方來過聽誤失真袖攜諸公詩丐我踵後塵顧我
雖不能欲辭恐師嗔勉作數句偈拙惡慚無倫

題澄上人頤庵

我生困語言老大猶棲遲咄哉一言失雖悔何能追常
欲說向人到口還忸怩不如靜中坐此理吾所知春風
入城郭古寺花開時廣庭積雨過紅紫初紛披偶逢頤
庵人強丐頤庵詩是庵清而虛底事名為頤南陵有徐
子頃嘗吏於斯作字妙羲獻學易深坎離慎言與節飲

卦象不可欺君看命名意往往只在茲

追和游謝氏山亭贈賢上人

春旱久不雨既雨風日清桑麻被膏潤往往爭欣榮
花鳥發詩思湖山歡野情駕言南畝遊遂有西塔行雲光
鬱在望地僻路亦生賢公方外交別來鶯再鳴相逢話
疇昔茗椀喜屢傾多謝二三子壺漿競邀迎

黃梅東禪寺

南晉今黃梅東禪舊青蓮曹溪竟何許龍朔知幾年我

聞二祖師屬袂茲褊褊片言道有契千古衣相傳栽松
與齋磴為此一大緣朝追固若追夜度亦大遙邇來五
百載兵火數變遷惟餘墜腰石繩竅徒空穿堂堂吳生
畫筆法世所賢絹素雖朽蠹丹青尚依然嗟予二三子
平生慕真詮來游獲瞻仰投老當周旋獨恨走俗狀明
朝又加鞭臨池更徘徊圓荷汎漪漣

題智果寺

呂侯妙章句珠玉走隣境想當落筆時豪邁不淹頃智

果古精舍松篁轉岡嶺幽人所盤礴俗客作遠屏春雲
忽解剝林日光炯炯門迎有高僧烏用賦渴井開絨讀
數過令我發深省老來習懶放萬事廢不整猶憐閒中
趣日月頗增永何當遂浮家百口具舴艋不見六一翁
夢寐在清瀨人生會如意歲晚果得請

菩提院

菩提古精舍兵餘但茅茨我行勸午暑少憩容奴炊山
僧老無子養蠶如養兒奈何煮白鹽迺欲縑青絲燕泥

固可惡覆巢似非宜不聞兩足尊頂鵲安無隱我亦學
佛者言之為興悲作詩書壁間以為浮屠規

黃頤琅玕山永福院

我從明光來十里得永福山中何所有離離見疎竹前
人目琅玕用意良不俗誰能對此君蔬飯賤梁肉

成相院

山前羅萬松邀我行數里不知幽人居但愛亂峰峙新
晴翠似潑乍熱汗如洗幸獲聽潺湲何妨濯清泚

弔魏敏功贈住庵通老

一別異生死三年能幾時埋玉不可見拱木徒興悲通
老奉香火坐閱歲月移圓顱點飛霜夷曠真吾師

和因老游水寨府治東軒二首

市井從東州水竹自西府我來與公偕槃礴日歌午從
容河底魚樂哉得其所此意與誰論相看默無語

買山荷疊錢照天水開府幽花有餘香誰復為賈午勝
句須斯人清遊更何所臨深未能還我欲作危語

題崇因院信上人宿雲軒

秋聲入高梧暝色上疎竹南山攏青螺過已淨如沐悠然孤飛雲窈窕轉林麓自疑歸去晚意欲窓下宿道人等虛空去來斷追逐雲來不吾拒雲去不吾速相從一息頃便覺靜緣熟何以照我心老蟾掛枯木

宿彰教寺

過市欲投宿穢隘非所安人言五里餘有寺潔且寬驅駕犯泥淖敢憚風雨寒稻塍與兔迳縈紆度千盤衣裘

被沾濕脚膝加蹢躅因思聖人語後獲當先難壯哉古
道場翬飛映層巒秀色藹松檜清香馥芝蘭我心大有
得豈惟厭遊觀行行勿躊躇霽日升雲端

贈六安文殊亮老

予是行按蓼館於文殊獲與亮老款坐上邂逅會
勝蓀公請談三夕而二師苦於病惱皆有高舉遠
引之興故作是詩勉之丁丑夏四月辛亥

我從東蓼來水竹遂幽討崎嶇至於六獲見文殊亮老

殊方外友僧門素稱寶平生首肯處可嗣布禪皓寤寐
思棒喝邂逅得傾倒何妨萃高人坐上識吾葆會勝索
枝撐得師恨不早勉為雲山留未可止中道

贈僧辨端

南僧如竹筆在處即成林雖去常人髮不異常人心邈
哉端上人所得趣向深雲泉香火裏日夕長苦吟為我
有時名踏雪來相尋相尋緣底事論詩復鳴琴我是折
腰吏衣帶塵土侵何以謝吾師恨無虞師金

送尚老之江西

豫章翠巖因老以書來招前無為報恩尚老於其
行也作詩送之

道人野鶴姿昂昂在鷄羣誰能戀場粟俯仰勞骸筋飄
然欲何之駐目西山雲西山甲南昌雄勝天下聞翠巖
為之冠有客許見分旋酌秀溪月煮茗特勸君寄言翠
巖老吾將謝紛紜尚有鼻端壘須煩為揮斤

贈浮屠勤上人

澹勤道人吾畏友也作別十二年為國清持鉢來
歸過敝廬見其坐禪窮晝夜至廢寢食歎其不可
跂及故作是讚

隅宿不問道此語幼所聞汨沒塵土中歲晚方得君學
道戒怠惰成功在精勤勤哉勤道者取名不徒云別來
十二秋東遊遍溫鄞持呪動至暮坐禪常達昕寸陰古
所惜君今惜餘分兢兢窮晝夜直欲忘齋薰軒昂冲天
鶴那容混鷄羣我老懶成癖見君但歡欣茅齋無一物

坐對栢子焚忽然捨我去翩若風中雲

龍門呈心老

千山倚天高一徑穿雲斜忽然見樓閣知是佛子家蒼
松老不死天矯如龍蛇霜皮自鱗皴風稍互槎牙幽花
似薝蔔清絕不可加過庭送好音異哉碧鷄伽我來不
忍去一步三咨嗟終當解冠裳從師卧煙霞

國清化人示寒山

師從天台來示我一集詩開編未及讀涕淚已交頤紛

紛世間人迷妄覺者誰浮沉苦海中欲出無端涯寒山
與拾得旁觀為興悲作詩三百篇勸戒仍嘲嗤覺此未
覺者當下成牟尼此意亦良厚柰何人罕知師持國清
鉢欲救雲堂飢贈言亦安用聊以報所貽

奉送果上人住開先寺

我昔遊成均年少心猶童倒床即甘寢寧問達與窮精
爽忽飛越夢到廬山中廬山最佳處二林占西東開先
在其間泉石清而雄分明我所記古剎磨碑豐長銜似

持節覺來夢還空
俛仰殆三絕
蹭蹬老更癢
貴賤等夢
爾覺夢一理
同持節何足道
得時可三公
說夢乃夢語
笑殺懶散翁
翁今往開先
憑何警盲聾
將此一轉語
截斷雙石碕
源源自何來
其去何所終

次韻因老見贈

扁舟歷陽來
訪君得少息
登堂默無語
見者稱目擊
去年糝江上
羣盜羅劒戟
君時濡湏游
入山笑相揖
肩擔祖師禪
問答揮即栗
豈惟警聾瞶
亦足慰岑寂
春容褪

丹青雨意鋪水墨定將儻赴感澄霽自端的麥秋數日
間飢腸頗貪得兵餘敝廬盡何獨空四壁維摩幸無恙
胡避有新室白雲本無心能歸定能出歸然三傑峰況
是舊相識我有半仙丹和劑等菖朮為言山中人蟠桃
已成實



| | | | | | | | |
|--|--|--|--|--|--|--|--|
| | | | | | | | |
|--|--|--|--|--|--|--|--|

欽定四庫全書

集部

相山集卷

四至九

詳校官左中允_臣瑋五珠

主事_臣呂雲棟覆勘

謄錄監生_臣溫廷鑑

欽定四庫全書

相山集卷四

宋 王之道 撰

七言古詩

信陽和同官喜雨韻

欲識農夫田作苦，久雨禱晴晴禱雨。禱晴得雨雨得晴，
此患到今傳自古。必汾非是蕭蘭馨，誠心一發通三靈。
文昌俗吏亦何者，乃能致雨興雷霆。爾來旱氣熾熾熱，
夜望天涯電光掣。原田嘉穀半焦黃，何獨枯魚濡涸轍。

忽然一雨洗瘴昏珠玉無邊難價論坐令愁嘆變歡抃
千巖萬壑江流奔從今不厭商羊舞十日一犁均下土
漏邦寒儉酒味醺且醴新茶共分乳庭前花草還青葱
想見黍稷紛芄芄吾君早晚復疆宇屢豐將見追元豐
天人大抵常相即人若必天天可必願修人事格天心
天若不從非所恤泰亨自復先朋來時通端不憂塵埃
新詩要非所宜辱敢以木李酬瓊瑰六年無蓄號不足
菜色定應緣半菽要令汙暴似海岳豈但河沙論秉斛

炎天赫日當流金去國多年思轉深只今淮北望霓切
須煩伊傳資商霖

次韻子厚弟喜雨行贈趙守端質

我生畏暑如畏焚奈此歲旱風塵昏十年廢放卧巖壑
名雖八品身黎元恒暘乞雨雨乞霽雨轉為淫暘轉熾
不知此理果何如每訝天心異人意去年避地還家園
蒿萊滿目高侵天秋陽肆虐冬益甚涉春陂澤皆平川
邇來焦稿遍區宇黃金融液膠流弩趙侯日為疲瘵憂

應怪魯書三不雨天人大抵常相資顧我錄錄傷無奇
鬻漿苦涼屠苦熱敢望屏翳從招麾聖主東巡羣后覲
萬里江淮方水運折衝禦侮賴親賢何獨為霖福斯郡
精誠昭格吾誰欺頃間禱雨人所知忽然簷溜瀉河漢
數聲霹靂轟相隨公堂六月清無暑旋磴龍團試分乳
官曹相賀復何言且戒農夫築場圃小人托庇安村墟
獲同野老歌而呼願公玉帶懸金魚奉報得雨禾生稊
霏霏不厭沾衣裾稍晴欲自躬犂鋤斯民食足吾其俱

何妨把酒仍觀書

酬潘縣尉

縣尉遠遺佳篇獎與過當而其中見及亡友錢子全王堯明二公皆俊人

非碌碌者不幸相繼死矣埋玉樹於土中使人情不能已輒用韻書謝

堯明文采燦星宿子全道義高金玉傷哉二子不可見
墓上悲風號拱木逢君論友話偶及令我吞聲為渠哭
因渠感君不我鄙遠寄錦囊詩一軸有如貝闕羅珠璣
東攬西拏厭吾欲又如康衢走騏驎朝越暮燕惟爾逐
匹夫獲罪坐懷璧誰使夜光衝節屋仲尼知本故稱水

請看懸崖瀉飛瀑我從二子方弱冠俛仰三終同轉轂
壯年登第今已老碌碌無奇堪齒錄羨君節操似松筠
雪裏高標仍絕俗已將義命等窮途肯為身名強榮辱
高情慷慨憐衰晚妙句縱橫巧膏馥開緘反復讀數過
骨竦毛森頭殼棘施隆報蔑君勿謂明月輕投得魚目
人生遇合會有日行矣鳴騶入空谷變調元化坐廟堂
長使斯民歌鼓腹

贈淮西運幹徐伯遠

伯遠得印於予里人楊德潤其文曰東海開國楊
自其先侍講與南昌潘延之游印蓋延之所遺而
故常侍徐公舊物也從潘入楊凡六十年至是復
歸徐氏亦異事也為作詩以紀之云

嗟予偃伏淮南村十年不踐公侯門誰令金印入魂夢
平章六字承君恩左手人頭右手印此理未可輕易論
丈夫蓋棺事始定擒戎會使來稱藩爭如徐子擅騷雅
筆力豪縱今文園楊君收印六十載細觀制作同新翻

為言常侍故家物其先得自南昌潘珠還合浦有時節
餘慶未艾鍾仍昆子今得之類摘鵲此貺重可輕瑱璫
便當準擬佩三印併與文安遺子孫

和王覺民梅花詩

覺民寄示梅花詩有強拙者屬和之意予衰也豈
能與諸公爭豪取其填塞章句可也

梅花似是東君客漏洩春風犯寒坼冰肌玉骨照雙泉
應為孤根借泉脉先生狂得次公醒詩思藹藹飄晴雲

為憐老拙有舊分，俾預勝賞沾清芬。我時被酒酒初透，
香撲鼻端曾一嗅。別來飛雪往未能，想見精神愈高瘦。
西湖處士真詩仙，東坡老人所推先。豈知此花自奇絕，
神助妙語相爭妍。浪言投李報瓊玖，牛後何如作鷄口。
我今無物報投瓊，木李雖輕聊藉手。先生標致良可人，
此詩不減花娉婷。相當欹枕初得句，夜興冠坐如驚霆。
願君追作淮夷雅，換取公卿重文價。嗟予衰矣不復論，
但欲高門容駟馬。

沈湯輔隱軒詩

小隱山林大朝市夫子命軒良有意仕途捷徑固無取
泉石膏肓亦猶次不知朝隱誰得之我恐曼倩為近似
公卿百執各有職豈容妄隱但充位古人祿仕所不免
意在全身近於智莊周梅福此其流吏隱之名可無愧
沈君有弟今休文咳唾成章數千字恥從舉子事進取
逸韻高情寓吟醉乃兄宦達方強仕翠竹停鸞想風致
君侯才業伯仲間退以求名名亦遂方今堯舜理四海

巖穴彈冠求自試朝廷既治羣吏肅何處堪為隱者地
不如市隱最得策大勝山林自憔悴花源繚繞轉紅綠
竹洞深沉入幽邃我聞此風頗健羨圖成未可日月冀
他時儻作江西游兄曰能來訪子季

大梁食李有感呈彥時兄

葵花已過荷花繁南風入戶清而溫擔頭有李初入眼
令人引脰懷家園三年為客在兩處李熟未果登清樽
翻思整冠誠可樂何苦鑽核輒不存急宜買冰致凝凜

全勝汲井供潺湲小床方簟嚼春雪一實自可輕瓊璫
扁舟行逐東南犇回首稻梁江上村相歡孰若弟與昆
古來唱和須麓墳

用子蘭韻賦九日小酌

春日歸來忽重九潦旱相仍歲無有庭前巖桂獨青青
此意於人亦良厚欲酬佳節拚一醉會有白衣來送酒
須臾殺核第羅列無蟹猶空把螯手坐來靈雨灑珠璣
洗出湖山競高秀三公在望無百里咫尺銀屏擁其後

三公銀屏蓋無
為南北山也

長篇落紙箭離筈大白浮醪簷注溜細

看黃菊與紅茱想像年時還話舊登高何必須人扶我
有筇杖頗堅瘦明朝寫出醉中語牽帥不知誰唱首

春晚書懷

十年萍梗三到吳走俗未暇觀西湖是行信步至湖上
水光山色開天壺游人雜遝半羅綺一徑不憚穿雲紆
歸來神思頓清發詩中寫出錢塘圖張侯妙語何所似
青玉為案黃金鋪要當聯轡事幽討邂逅得句相招呼

東坡已死不可作因君對景還嗟吁水僊配食竟莫舉
但見舊隱環菰蒲山間有寺過三百終期徧走參能儒
還家兒輩若問我庶免不知空囁嚅

和劉春卿夏日閑旱次韻

何人夜作秋蟲號吟詩坐對山月高想當龍門奪錦袍
從臣拱手看揮毫衡茅咫尺臨江臯浮光灩灩翻金濤
滿帆何處乘風艘千山過眼同犇逃不防鱸鯉魚魚羔
酒酣起舞如飛猱醉中往往笑成咷一時輩流籍湜朝

嗟予褻剥意鬱陶七年坐困山林牢邇來天旱地不毛
金魚薪蟻何噉噉誰能讀詩夜焚膏只益心蓬增目蒿
丈人純白羞桔槔終日抱甕忘其勞今春屬國紛旗旄
兩淮供億爭鳴磬干戈載戢弓其弢此行輔弼環蕭曹
藁街佇見懸首豪買牛賣劍犢賣刀我雖不飲當漱醪
堆盤況有瑤池桃鹿鳴會賦嘉賓教予衰尚可追風騷
過集湖德濟廟用趙尉廉留題韻示周欽夫程

彥游

秋陽汎汎流清暉帆腹不張旂脚垂靈祠輪奐湖之麋
水天一色成玻瓈西軒爽塏高不危憑欄下瞰羣山卑
鬼神亮我心無欺風濤縱險夫何疑區區犇走勞驅馳
和光未免世俗隨相逢一笑聊伸眉明朝摻袂還東之
蕭曹有節未見奇往往樵牧相鄙夷吾生傾否會有時
窮愁過眼無足悲

次韻張文伯喜雨

新詩句句堪流傳令人讀之神凜然孟君已死不可見

如公筆力今無前天生百穀養萬姓暄潤稍闕功難全
江城秋早望一溉斯民窮極伊誰憐滂沱忽澍三尺雨
稿苗厭厭蕉縣縣不知何以遽得此有賢太守方承宣
焚香默禱辭未絕精誠已格高高天油雲垂布若可攬
沾濡車盖初言旋西成指日多黍稌頌歌未負賡豐年
豚蹄孟酒謝神貺鼓腹一笑非予偏

和董令升喜雨用前韻

夜聽簷聲翻急雨想見膏潤均率土先生休戚共斯民

憂在悵焚非憚暑人情類被饑所移我爾相忘自甘苦
寧從禱旱身暴日肯對驅蝗歌脩俎用心何獨追老杜
大庇寒儒歡廣宇要令匹夫被惠澤上致吾君堯舜數
嗟予糞朽伏邱壑尺短寸長無足取渚蒙珠玉過稱揚
丈夫殆以氣相許

次韻畢少董游西湖

西湖春晚未全熱湖上山光互明滅往來冠蓋競駢聞
斷續笙簫共伊咽我憐湖山山見憐波間湧出佳人鈿

太真一去不復返圓荷萬點黯脂錢船頭美眇珠的皪
不必洞房深處覓忽然相值更相呼嫩藍衫子山爭碧
腸斷騷人一軸詩細看煙柳想腰肢明年我亦西湖去
遲日光風二月時

西湖遊次韻趙見燭

山鎮在越澤在吳東南形勢憑江湖不知弱水竟何處
恍若員嶠連方壺海門潮至飛雪湧天竺雨過遙青紆
十年不見看愈好正復妙筆那能圖蒼松搖風翠蓋偃

芳草藉地柔茵鋪僧舍朝遊恣登覽酒樓夕醉爭歌呼
竭來俛仰春又曉對花無語空長吁作詩既非拙者事
強欲寫書編澤蒲偉哉得志佐明主進退百辟稱鴻儒
應憐伺候奔走輩終日趑趄仍囁嚅

天寶歌和魏定公文次韻

連昌宮中馬為樂一時舞馬黃金絡君王養欲臣養文
忠鯁漫多寧救藥嗷嗷萬國風中船檣傾拖壞夫何言
潼關莫拒范陽賊傷哉天廡空連錢翠華西去遙指蜀

應念霓裳舊家曲六軍敢怒誰敢呵馬足空污太真肉
始皇布漆徒堅城元海斬木徒輕兵驅魚驅雀強鸛獼
乃使後世蒙佳聲亂離每憶昇平日忽對新詩重嗟泣
望仙花草自春秋怡悵六龍歸未得

和江和仲司理喜雨

天憐轍鮒噓殘濕震奮雷霆起幽蟄清風入夜送雨來
大慰焦枯望霓急新詩如雨雨未休相對自可忘為憂
東臯秋稔想多秫預期劇飲無論籌老蟾宿畢君知否

欲煩更問東家丘我今已具西歸舟會見扶桑升赤虬
鹿泉居士王覺民頗有杜子美不徹之惱和東

坡憶梅韻箴其膏肓

鹿泉居士身若槁不慣看花夢顛倒桐廬有客燕新昏
妄託嬌癡重伊惱凍雲垂地雪欲落斷雁叫羣天尚早
一枝何處寄春來便覺寒窻自華好瓊瑤萬里眼界淨
咫尺前村莫輕掃留將青女伴孤芳長向茅齋照衰老
先生才思老不進寤寐池塘見春草對花酌酒祝東君

煩把窮通問蒼昊

次韻胡德輝松軒時乞兵戍淮

伐蛟生得鬚髯蒼隱然為屋分三梁
廣寒恍若東西廂
清風入座衣披猖
蕭蕭終日聲奏篁
一洗鄭衛無伊涼
嗟予頑鈍鐵石腸
時危命蹇甘皇皇
江城正苦夏烈日
淮甸已懼秋飛霜
綠尊翠杓且徑醉
喜與夫子參翱翔
平生邱壑老增劇
夢想朝露珠璣香
何時元戎北渡森
旗章料敵制勝一
一盡所長鷄羣野
鶴看昂昂

大柿行

丙辰夏秋雖足雨百穀與蔬果皆凋耗不豐惟柿持
大異常歲昔所未見夫大柿大事也其為國家之
祥乎其掃清強敵迎還兩宮之兆乎馘豫臬麟蓋
不足道也作大柿行以歌之

君不見鄭虔學書晚彌篤歲收柿葉貯三屋興來寢食
兩俱忘但覺毛公老而禿又不見梓人造車度羣木木
中無火柿所獨舊言蓋軫象乾坤須信斡旋歸一軸美

哉此果有常德結實何曾問荒熟霜餘萬顆綴寒林下
視黃柑類奴僕牛心取象庶彷彿熨斗得名何浼瀆火
乾既許暖關膈冰冷當知解煩燠今年夏秋足時雨盡
道和氣鍾百穀西成僅得十之五亦見陰陽有盈縮就
中朱實繁且大照野煌煌駭人目較之常歲遠不侔正
似斗勝難趣斛國家運厄困強敵一紀於茲事弓韞空
庭喋血在今年我已不疑何更卜禾和鞋諧古云識大
柿之祥天下福請賡繼伐獻吾君王者功成四方服

秋日苦雨和子厚弟韻

烟鬱濕薪費挑撥可堪餘瀝濺如潑吹霞弄日語縱工
正恐詩人類迂濶屋角蕭蕭霜葉鳴夜靜亂我槽床聲
詩成欲寫輒復已鄰雞犯早催天明

贈曾桑中彈琴

春寒沍連冬春雪深數尺千門擁瓊瑰跬步燕越隔朝
來有情意淡日透雲隙殷勤貴公子訪我跨龍脊登堂
笑不休為言督詩責君嘗許我詩俛仰歲三易至今猶

未償無乃言遂食我老苦健忘百不記六七公子誠有
意何吝話疇昔昔也君過我我方事琴厯嘗為陽春弄
次第長短側君乎鍾子期此舉不輕擲聞之思茫然仿
彿見擘趲我有朱絲絃塵埃久侵蝕試煩一再鼓助我
毛穎力公子不我拒抱琴枕雙膝須臾扣商絃當春變
秋律涼風着草木離離盡成實我貧人不知陋巷家四
壁何幸空乏中登此黍與稷但恐時令乖瘡痍至生疾
公子其反是叩角夾鍾激不然總四絃命宮以調適坐

令景風與慶雲為祥遍方國

欽定四庫全書

相山集卷五

宋 王之道 撰

七言古詩

送趙仲達

仲達比在蘄州教授彥逢弟處訓猶子遼去年來
赴運屬徐季功之請朝夕與兒輩遠邈相討論老
拙間得奉談麈今當東還來索鄙句窮愁無好語
勉強塞其請成古詩十四韻奉送且簡莫德裕

人生邂逅非偶耳一面豈容輕愠喜白首如新傾蓋歡
誰解乘閒究斯理君家江南我江北南北相望殆千里
惠寵顧我端有由衰滯不應能致此為言前歲在金沙
幽討窮探徧山水論文獲與阿逢游賸馥殘膏丐猶子
是行來赴徐卿召昨日扁舟方戾止阿逢聞是公僧彌
予乃阿逢門下士知公閒放今杜門所舍與公殊密邇
何妨旦夕侍杖屨執經仍與諸郎齒過從彈指見周星
入室芝蘭被遺遠須知四海皆兄弟高義似君誰可比

徐卿報政趣歸朝
畫鷁高檣艤江涘
明朝車騎遂東還
有便時時遺雙鯉

贈李廷吉知縣

慶源王公所至視吏民如家人
人安樂之東坡先生有詩云
青衫半作霜葉枯視民如兒吏如奴吏
民莫作長官看我是識字耕田夫
蓋為慶源作也李無為與予昧平生
方到官之初境內大旱曾不三日而雨
遽霑足予固疑其有以致之已而訪

之民間盡能言其拊循矜恤之政咸以為當世未
見其比者故因求之古人得王慶源于東坡詩中
輒次其韻奉寄庶幾異時以備史官之採擇云紹
興壬子

李侯入境憐焦枯指麾屏翳如家奴坐令大旱變霖雨
一時凋瘵歌巖夫我思東坡不可見夜諷新詩還撚鬚
慶源老人骨已朽愛民似子當今無稻田上下水聲接
農家準擬相攜壺南鄰敗屋歌欲倒君來往往人爭扶

流離復合燕相賀
向人競欲嘲解襦
吏民莫恠吾面瘠
耄倪艱食方饑癯
政聲不必家置喙
自然和氣成歡呼
何當相聚飲一斗
高吟大笑臨邛壚

次韻秦壽之雷江阻風

君之是行亦不惡
到處名山得佳作
江神好事欲援例
橫起狂風捲帆脚
要求詩句須少駐
故戲舟師令暫泊
雷江正在淮南岸
萬頃黃蘆映青廓
不知眼界濶多少
但見炊煙耿墟落
歸心浩浩孰撩動
歸夢忡忡予忖度

怒濤底事強留滯清夜無眠屢驚愕遡游初冀日千里
今比驅車反成錯人生離合自有數誰謂江神能見謔
新詩入筆走驂騑逸絕塵那可却何妨有酒發妙思
坐對陶泓自斟酌韻嚴語險屬和難顧我才慳子非虐

曉解糝潭追和張文潛白沙阻風

江上驚風夜穿屋扁舟正艤沙頭宿燈寒屢剔短檠青
酒暖孤斟老盆綠更闌艇子催人起泥汙而今趁朝市
披衣踉蹌出馬門凌波逐浪來江豚鳴櫓嘔啞濺飛雨

靜聽依稀似人語月城百里指顧中只好張帆使風去

和李似矩馬圖歌次韻

畫工妙處稱毛羽我欲論功第先免不知心手會天機
象管紛紛誰比數寥寥千載一曹霸墨妙于今傳二馬
龔生重馬輕尺璧蔑視韓韋復何者爾來一顧遇孫陽
奔走侯門日無暇一匹騰驤一匹嘶先生愛駿非愛奇
有如霓裳第三疊按圖知拍逢王維新詩邁絕今老杜
作經未必多馬蹄先生馳騁金馬裏口角雌黃即公是

欲知早晚定登庸步武風雲起平地偉哉騁駟世英物
一日早行三萬里

應資深康樂園四詠

溪頭柳色春無際溪水浮天一張紙東君戲草康樂園
旋入天桃與繁李亂花無數不知名往往倚檻窺前楹
有時酒惡吐欲死先生來約花間行

露梢戛戛敲鳴玉雲葉差差傳新綠亭前十頃碧琉璃
過雨荷花淨如浴客來不迎君莫嗔我有清風如故人

先生午醉睡正熟長須倒盡床頭春

不知眼界幾多濶隱隱青山在天末湖光釀就琥珀濃
應助先生恣澆潑西風搖落黃花秋江城有蟹供拍浮
人如淵明亦不惡肯使臨賦成悠悠

誰人獨釣江南雪雪滿江南鳥飛絕先生對雪望江南
嗅認梅花忍寒折癡雲捲盡清月流小舟橫卧南池頭
子猷乘興欲何往歸歟莫為伊人留

華亭風月堂避暑

予自無為來獲與趙應之市舶親友相從於海上
而吳伯和司理素昧平生一見蒙傾蓋暇日三人
避暑風月堂邂逅王壽茂主簿并鍾幹二公基酒
終晷樂可知也輒成古風以丐撫掌一笑

大哉天休何穹窿惟王配天居域中東西南北乃四裔
盛德可使車書同吾皇中興繼商武小雅不復歌車攻
年來幽障滅烽燧梯航萬里來夷戎華亭瀕海古巖邑
商民填委百貨通雕題交趾在何許但見巨艦浮蒼龍

國家懷遠固有道緩征薄稅垂無窮名官市舶司置長
往往所任多名公洪侯才望在人右暫此出使良忡忡
使臺雄勝壓湖水飛橋百尺如垂虹作堂枕水傍風月
想見浩氣盤高空我來五月過淫雨炎雲烈日方熾熾
登臨不獨眼界豁一洗煩暑清心胃偕行相遇二三子
吳趙與我并王鍾高談疊疊到莫逆圍碁把酒還從容
輕風拂拂動襟袖明月炯炯窺簾櫳湖光十頃碧上下
身世恍在玻璃宮何人倚檻正橫笛數聲裂石開雲峯

忽然琵琶又繼作聲此百榼誰能供夜闌歸去不成寢
卧聽湖外鳴豐隆

次韻因老胡避遊

新詩滾滾江流東一瀉萬里誰能窮平生清峭不近俗
雪山突兀江頭峯相逢一笑莫相避自古高人苦難致
涪翁骨冷喚不醒且向新詩求筆勢君於涪翁真後身
有同次律前身僧語言直下見理窟何須辛苦從張憑
對君令我思秋菊三月褒山如一宿君看玉局感秋吟

嘆息流光豈予獨

送管養正長歌

餞別宜有酒我無一杯漱君口送行當以贐我無一
物藉我手與君意氣真相知君嘗謂予可言詩獨有
詩句堪送別欲賦復止空嗟咨送君胡為三歎息文酒
從今失三益干戈日尋雅道衰吾徒一別真可惜問君
四海無家歸飄然此去將何之答云南陽善城守屢以
孤壘攘重圍我今欲往誠有以主帥好賢同邑里輜車

儻許載病翁長策猶能靖多壘
騏驎君看伏櫪姿髮雖
種種心不衰胷中之竒老未吐
忍死山谷甘寒飢君不
見元龍豪氣真磊落卧見許生
自旁若時危康濟乃丈
夫問舍求田匪餘樂又不見越
石夜半聞雞鳴披衣起
舞賀友生風塵瀕洞四海亂英
雄攘臂收功名古人相
期蓋如此豈效世間兒女子出
門惘惘色可憐君亦為
之殊可鄙壯君此語膽忽張羣
憂散盡增激昂西風獵
獵天落霜千山凋林松檜蒼寒
菊始花黃且香高空無

雲老鵬翔登山臨水秋興長行人欲行送者傷我獨不
復傷知君壯志殊未央為君援筆寫長句一洗古今離
別腸

冬不雪春苦雨外臺為民心惻檄郡請禱於法
輪應感尊者悉獲靈貺曾不終日教授有詩以
發揚盛美郡人相山居士聞而悅之勉次其韻
誰令一日如三秋仁人方念淮南州斯民忍饑望麴麥
積雨又有傷殘憂冬溫土燥生春瘴半夜風聲來枕上

曉看飛雪欲堆簷白馬參差攢玉嶂

白馬山名

年饑高下藝

麥多暴如山阜沔如河那知雪欲苦淫潦兩岐半吐翻
隨波欣聞萬事一言了使者勤民坐待曉指麾郡將率
官僚出郭共迎羅漢禱由來天意每因人況自至誠宜
感神明朝披霧走烏轡晴光杲杲清無塵回頭菽粟賤
如水醉飽田間摩腹背周行四海不齎糧可但攜壺餉
鄰里出遊遂繼文昌謠追鋒行赴公車招快將劉晏幹
排手袞衣入相裨唐堯廣文才氣邁燕許分教芹宮從

少駐政德穩步玉筍班好尾輜軒上天去

次韻孫興宗秋懷

秋山赫赫明丹楓秋天隱隱分玄鴻不知眼界濶多少
九華突兀撐晴空嗟予老病百事懶誰能強勉追兒童
讀書既苦齒多豁屬文益覺心如蓬年來衰甚更齟齬
乘舟賣麵皆遭風茫茫有類墮雲海躊躇四顧迷西東
感君賦秋肯寄我開緘反覆歌三終如痿忽起盲忽視
角力未易分雌雄寒鄉冰雪正凝沍暖回愛日何烘烘

驚濤巨浸浩無際安流利涉輸艤艫車門圭竇僅容膝
規模敢擬阿房宮生平未慣新斧鑿斲削便許從共工
偉哉歐梅兩黃鵠逃名詩酒俱稱翁余生顧後八十載
賢愚雖異襟期同知君尚友取前哲言之聊復輸丹衷
何為規規事騷雅乃欲索我章句中春容大軸爛錦繡
令人一覩情融融清新嫵麗似鮑謝豈徒與學稱淹通
人能平地覆一簣不輟會致邱山崇披雲俛仰三百日
相逢底事常怱怱去年江上識君處鑿冰初見陽冲冲

分攜不覺秋又晚向來早氣方蘊隆君如鎮西我淝水
我往無事還何功而君被擢試多士攷覈曲盡權衡公
作詩惡用求好語好語正自添詩窮有時嗣響姑趣韻
茲意祇欲安微躬爭如閉門絕慶弔著書遠繼吾家充
靜言培塿亦何罪不遑正坐睎衡嵩茅齋雨過風露肅
青燈夜諷賡秋蟲更闌耿耿不成寐卧聽江城鳴畫筒
上元後漕幕同僚二十八人會飲於西湖登千
佛閣運幹趙漁樵希聖以坡詩七言絕句分韻

得陌字

福星臺畔依紅客，厭踏紅塵穿紫陌。湧金門外泛蘭舟，
兩岸融融春水拍。隔浦笙歌寄幽思，向陽花柳饒春色。
六橋突兀披丹青，千佛森羅眩金碧。登臨肯作懷古愁，
志在雲臺書竹帛。須臾飲散晚風號，却掃陰霾生桂魄。
含山令尹章邦基，即其所居剡山得石嵌空，乃
作堂於其上而目之曰玉壁窟。求詩諸公子，不
識邦基而與其姪無為簿濟之游。濟之索詩，故

為賦之

我聞美玉地所秘出為世用自有時譬猶景星與慶雲
千載往往一見之君家玉璧豈無說鑿山得石夸瑰奇
豈惟蒼翠實相似溫潤清越瑤璵姿細看高廣類牆壁
以璧名之故其宜剜剜不已石無盡此窟未易窺藩籬
作堂正在佳絕處下視海岳如城池錢塘雪浪湧澎湃
天竺煙岫紛參差君于其間日成趣長篇短句揮蛟螭
乃知地靈不愛寶要令景物求新詩顧我與君無半面

牽帥阿咸難固辭沽哉沽哉吾與玉它年相見期相知